



MALAYSIA

# PENYATA RASMI PARLIMEN

*Parliamentary Debates*

## KAMAR KHAS

*Special Chamber*

**PARLIMEN KEEMPAT BELAS  
PENGKAL KEEMPAT  
MESYUARAT KEDUA**

## K A N D U N G A N

### UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Keselamatan Siber Kementerian Pertahanan  
Malaysia**

- *YB. Tuan Sivakumar Varatharaju Naidu  
(Batu Gajah)*

(Halaman 1)

### USUL MENANGGUHKAN MESYUARAT DI BAWAH P.M. 18(1):

- **Pilihan Raya Negeri Sarawak**

- *YB. Dr. Kelvin Yii Lee Wuen (Bandar Kuching)*

(Halaman 4)

**MALAYSIA**  
**KAMAR KHAS**  
**PARLIMEN KEEMPAT BELAS**  
**PENGGAL KEEMPAT**  
**MESYUARAT KEDUA**  
**Rabu, 1 Disember 2021**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL**  
**BERKENAAN PERKARA TADBIR KERAJAAN (P.M. 17)**

**Keselamatan Siber**  
**Kementerian Pertahanan Malaysia**

**2.34 ptg.**

**Tuan Sivakumar Varatharaju Naidu [Batu Gajah]:** Terima kasih, Tuan Yang di-Pertua. Tajuk ucapan saya hari ini ialah berkaitan dengan keselamatan siber Kementerian Pertahanan Malaysia.

Tuan Yang di-Pertua, demi mempertahankan keselamatan dan kedaulatan negara, Kementerian Pertahanan sentiasa perlu bersiap siaga untuk berdepan dengan ancaman secara fizikal. Dalam pada itu, negara kita juga terdedah dengan ancaman siber yang lebih bahaya. Apakah strategi Kementerian Pertahanan menghadapi ancaman ini. Serangan siber, jika berlaku akan memungkinkan data sensitif pengguna terdedah dan perkara berkenaan sememangnya paling ditakuti.

Oleh yang demikian, Angkatan Tentera Malaysia harus sentiasa memantau dan mempertingkatkan aspek keselamatan siber. Apakah langkah-langkah memperkukuhkan rangkaian pemantauan dan pertahanan komunikasi Angkatan Tentera Malaysia serta melindungi rangkaian komunikasi strategik pertahanan negara. Nyatakan serang-serangan siber yang pernah dihadapi oleh Kementerian Pertahanan Malaysia dan bagaimanakah masalah ini ditangani dengan cekap dan berkesan? Apakah tahap keselamatan siber yang sedia ada.

Berapakah peruntukan kerajaan yang diunjurkan untuk memperkasakan pertahanan siber dalam Rancangan Malaysia Ke-12. Adakah peruntukan ini mencukupi. Sekian. Terima kasih.

**2.36 ptg.**

**Timbalan Menteri Pertahanan [Dato' Sri Ikmal Hisham bin Abdul Aziz]:** *Bismillahi Rahmani Rahim. Assalamualaikum warahmatullahi wabarakatuh.* Salam sejahtera, selamat petang.

Tuan Yang di-Pertua, terima kasih kepada Yang Berhormat Batu Gajah yang telah membangkitkan beberapa pertanyaan berkaitan isu keselamatan siber yang juga menyentuh mengenai peranan Kementerian Pertahanan. Sudah pasti, selaras dengan peredaran zaman teknologi yang kian mencabar, kegusaran Yang Berhormat Batu Gajah berkaitan keselamatan siber negara ada asasnya.

Tambahan lagi, negara sedang bergerak ke arah teknologi 5G yang akan meluaskan lagi jaringan perhubungan dan pergantungan aktiviti seharian rakyat Malaysia secara atas talian. Ini sudah pasti perubahan rancak seperti ini memerlukan jaminan keselamatan daripada agensi keselamatan dan pertahanan di Malaysia, khususnya dari Kementerian Pertahanan.

Secara umumnya, kita tahu sesuatu data adalah maklumat yang amat bernilai yang mengandungi bermacam bentuk informasi. Ketirisan data akan mengakibatkan banyak implikasi lain boleh berlaku termasuk ancaman keselamatan siber negara. Kementerian Pertahanan sentiasa peka dan sensitif terhadap perkara ini. Bagi menjaga kesucian data di bawah seliaan dan kelolaan kementerian, kita sentiasa berusaha meningkatkan perkakasan dan perisian dalam usaha mengekang data sensitif daripada jatuh ke tangan pihak yang tidak sepatutnya.

Peningkatan, pengisian dan perkakasan ini sudah sememangnya memerlukan satu peruntukan khusus supaya usaha ini lebih berfokus. Pada masa ini, Kementerian Pertahanan dan Angkatan Tentera Malaysia secara berterusan berusaha untuk meningkatkan tahap keselamatan siber melalui beberapa rangka strategi dan inisiatif-inisiatif berkesan antaranya, menubuhkan Bahagian Siber dan Elektromagnetik Pertahanan yang akan memperkasa dan mengukuhkan fungsi dan tugas Pusat Operasi Pertahanan Siber atau juga dikenali sebagai *Cyber Defence Operation Center (CDOC)*.

Bahagian ini bertanggungjawab sepenuhnya kepada semua aktiviti berkaitan siber dan elektromagnetik yang merangkumi keselamatan komunikasi dan keselamatan siber. Melalui pewujudan bahagian ini juga, ia akan meningkatkan keupayaan sedia ada, Pusat Operasi Pertahan Siber (CDOC) dengan perolehan keupayaan pertahanan siber, latihan-latihan yang berterusan kepada anggota ATM berkaitan dan peningkatan kepakaran sumber manusia di dalam bidang pertahanan siber.

Bagi menjawab soalan Yang Berhormat Batu Gajah mengenai jenis serangan siber yang pernah dihadapi oleh kementerian. Pada ketika ini, corak serangan siber yang dihadapi oleh ATM secara umumnya adalah sama dengan perkembangan ancaman siber di peringkat global. Landskap ancaman siber yang utama yang diperhatikan adalah meliputi aktiviti risikan ataupun *espionage*, jenayah dan *hacktivism* atau *hackers*. Ancaman kategori *Advanced Persistent Threat (APT)* bagi tujuan risikan merupakan ancaman utama yang dihadapi secara berterusan dan sentiasa diberikan perhatian oleh Kementerian Pertahanan.

Sehingga kini, semua ancaman yang dikesan telah berjaya disekat dan ia tidak menunjukkan sebarang petanda kritikal terhadap *posture* keselamatan rangkaian organisasi. Kementerian juga telah memastikan bahawa tiada sebarang ketirisan maklumat yang berlaku sehingga kini. Tuan Yang di-Pertua, bagi memastikan rangkaian dan maklumat organisasi ATM berada dalam persekitaran yang selamat, beberapa tindakan di peringkat dalaman dan luaran telah diambil seperti berikut:

**■1440**

Pertama, tindakan di peringkat dalaman dengan melaksanakan pemantauan rangkaian secara berterusan melalui Pusat Operasi Siber (CDOC), mewujudkan tim Tindak Balas Keselamatan Insiden (*Security Incident Response*), meningkatkan keupayaan perisikan ancaman siber (*cyber track intelligent*) dengan izin dan kemampuan forensik digital. Selain daripada itu, kesedaran tentang konsep *cyber-hygiene* di kalangan warga Kementerian Pertahanan dan ATM sentiasa dipupuk melalui pelbagai kempen dan peringatan secara berkala. Program-program ini dirancang dan dilaksanakan bagi menjamin pertahanan keselamatan rangkaian yang lebih menyeluruh.

Kedua – yang tadi di peringkat dalaman. Ini kedua inisiatif di peringkat luaran pula. ATM telah menjalinkan kerjasama perkongsian maklumat dengan beberapa agensi dari dalam dan luar negara melalui pelbagai saluran. Hubungan kerjasama dua hala dan pelbagai hala sebagai contoh melalui platform *ASEAN Defense Minister Meeting Cyber Working Group* turut dilihat berjaya meningkatkan tahap kesiapsiagaan pertahanan siber ATM.

Tuan Yang di-Pertua, bagi pertanyaan Yang Berhormat Batu Gajah mengenai peruntukan yang diunjurkan untuk memperkasakan pertahanan siber di bawah Kementerian Pertahanan, suka saya memaklumkan bahawa pembangunan keupayaan pertahanan siber dan elektro magnetik telah dirancang secara berperingkat berpandukan kepada peruntukan semasa. Pada masa kini, unjuran keperluan peruntukan bagi pertahanan siber telah dirancang dalam tiga siri Rancangan Malaysia iaitu RMKe-12 hingga ke RMKe-14.

Secara kesimpulan, kementerian berharap melalui inisiatif-inisiatif yang disebutkan di atas serta perwujudan bahagian siber dan elektromagnetik pertahanan di bawah ATM ia akan membantu serta meningkatkan keupayaan kementerian dalam mengatasi pelbagai ancaman siber di dalam negara serta secara tidak langsung untuk membantu institusi dan agensi keselamatan siber yang lain di Malaysia. Akhir sekali Tuan Yang di-Pertua, maaf tadi Tuan Yang di-Pertua. Yang Berhormat Batu Gajah ini Tuan Yang di-Pertua, semalam dapat dos yang ketiga.

**Timbalan Yang di-Pertua [Dato' Mohd Rashid Hasnon]:** *[Ketawa]*

**Dato' Sri Ikmal Hisham bin Abdul Aziz:** Jadi saya tahu dia ada kesan sampingannya. Dos ketiga ini menyebabkan dia pun tidak sihat. Jadi kita semua doakanlah dia cepat cergas. Terima kasih.

**Timbalan Yang di-Pertua [Dato' Mohd Rashid Hasnon]:** Terima kasih.

**Tuan Sivakumar Varatharaju Naidu [Batu Gajah]:** Terima kasih Yang Berhormat Timbalan Menteri.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri Pertahanan atas jawapan itu. Ahli-ahli Yang Berhormat, dengan itu tamat sesi ucapan di bawah usul berkenaan Perkara Tadbir Kerajaan Peraturan Mesyuarat 17 pada hari ini.

**USUL MENANGGUHKAN MESYUARAT**  
**DI BAWAH P.M. 18(1)**

**Pilihan Raya Negeri Sarawak**

**Timbalan Yang di-Pertua [Dato' Mohd Rashid Hasnon]:** Ahli-ahli Yang Berhormat, menurut keputusan yang telah dibuat pada hari ini. Satu usul di bawah Peraturan Mesyuarat 18(1) telah dibenarkan untuk dirundingkan pada hari ini. Saya mulakan sesi ini dengan memanggil pencadang usul, dipersilakan Yang Berhormat Bandar Kuching untuk mengemukakan ucapan dalam tempoh – terpulang Yang Berhormat, *maybe 10 minutes? It's up to you.*

**Dr. Kelvin Yii Lee Wuen [Bandar Kuching]:** 10 minit boleh.

**Timbalan Yang di-Pertua [Dato' Mohd Rashid Hasnon]:** Baik. Terima kasih Yang Berhormat, teruskan.

**2.43 ptg.**

**Dr. Kelvin Yii Lee Wuen [Bandar Kuching]:** Terima kasih Tuan Yang di-Pertua dan terima kasih Yang Berhormat Timbalan Menteri kerana datang ke sini untuk menjawab soalan yang diajukan kepada pihak kerajaan tentang isu yang sangat penting ini. Saya memahami bahawa mungkin Yang Berhormat Timbalan Menteri tidak ada semua jawapan yang diperlukan kerana ini melibatkan banyak kementerian dan melibatkan banyak mungkin *committee* yang ada tetapi saya hendak tahu iaitu;

Pertama sekali, sebenarnya apakah pelan kerajaan untuk menghadapi ancaman varian Omicron ini terutamanya daripada segi pilihan raya? Saya memang mengambil maklum kenyataan *quoted* Menteri, Yang Berhormat Dato' Seri Hishammuddin Tun Hussein semalam yang mengatakan bahawa peralihan fasa endemik akan ditangguhkan kerana ancaman Omicron ini. Malah Dr. Lam Sai Kit daripada *Academy of Science Malaysia* telah meluahkan kebimbangan beliau terhadap varian ini terutamanya dengan PRN Sarawak yang akan datang. Ini kerana kita lihat pertambahan pergerakan penduduk merentas sempadan.

Jadi saya ingin bertanya, adakah kerajaan ini bercadang atau akan mengkaji keperluan untuk memperkenalkan darurat sekali lagi untuk menangguhkan PRN Sarawak sebelum kita benar-benar memahami implikasi *variant of concern* ini. Ini kerana, kita – contohnya, kalau kita hendak kawal pergerakan penduduk, kita hendak kawal sempadan (*border*) kita, ini juga mungkin akan melanggar prinsip demokrasi kerana ini akan memberikan halangan kepada orang Sarawak untuk balik mengundi dalam pilihan raya tersebut.

Jadi sebenarnya, bagi saya isu ini sebenarnya dapat diselesaikan jika SPR menggunakan tanggungjawab mereka untuk melakukan reformasi yang sepatutnya. Jadi bagi saya – ini pendapat saya, SPR sangat mengecewakan. Mereka ada masa dua tahun untuk membuat pembaharuan dan adaptasi reformasi yang sepatutnya ada. Dalam dua tahun pandemik ini, mereka telah gagal untuk rakyat Sarawak, untuk rakyat Malaysia dalam peranan mereka untuk memperkenalkan penyesuaian yang diperlukan, reformasi yang diperlukan supaya kita dapat mengundi dalam keadaan yang lebih selamat dan juga untuk menggalakkan penyertaan pengundi yang lebih besar terutamanya rakyat

Sarawak ataupun Sabah yang tinggal di luar negeri mereka sama ada bekerja ataupun belajar di sana. Sepatutnya SPR menggunakan peluang ini untuk mencari cara inovatif untuk menggalakkan lebih banyak penyertaan yang lebih besar dalam pilihan raya tetapi telah gagal dalam peranan mereka.

Jadi, saya sebenarnya membentangkan usul ini kerana saya berharap – saya tahu ada masa mungkin tiga minggu lagi sebelum PRN Sarawak. Saya tahu memang kalau kita hendak buat adaptasi, kita hendak buat reformasi sangat sukar untuk kita buat, sempat untuk PRN tersebut. Akan tetapim kalau kita lihat keadaan – sekarang tiket kapal terbang ke Sarawak gila jauh melambung tinggi. Kita boleh terbang ke New Zealand, Australia dengan harga tiket tersebut. Ini disebabkan kawalan sempadan yang dikenakan oleh pihak Kerajaan Negeri Sarawak, saya tahu. SDMC – mereka mengawal jumlah penerbangan yang datang ke Sarawak. Bagi saya, ini sangat bertentangan dengan amalan demokrasi yang sihat.

Jadi adakah pihak Kerajaan Persekutuan sudi berbincang dengan pihak SDMC? Jangan kita biarkan SDMC yang sepatutnya untuk mengawal penyakit berjangkit di negeri Sarawak, dilihat sebagai kononnya satu alat politik untuk menyekat atau menghalang orang daripada balik untuk mengundi. Kita lihat kalau RM300, RM600 untuk balik mengundi satu undi, siapa hendak balik? Kita punya gaji pun tak sampai RM1,000 lebih, RM2,000 lebih, kalau balik RM600 demi satu undi? Ini akan menghalang amalan demokrasi yang sihat. Bagi saya, ini sangat mengecewakan.

Jadi saya harap kerajaan terutamanya Yang Berhormat Timbalan Menteri yang menyelia EC mungkin dapat mencari satu jalan penyelesaian. Bagi saya, saya telah bahas isu ini dengan kerap kali. Kita sepatutnya memperkenalkan undi pos ataupun *absentee voting*. Adakah mungkin – saya cuba hendak tanya, dalam tiga minggu ini kita dapat pinda apa-apa undang-undang, pinda apa pun *by laws* yang diperlukan, adakah *absentee voting* dapat dilaksanakan sempat untuk PRN Sarawak?

Saya berikan contoh atau saya berikan mungkin satu cadangan. Pejabat EC ada di seluruh negara, setiap bandar ada pejabat EC. Adakah pejabat SPR tersebut dapat digunakan sebagai tempat mengundi untuk mungkin rakyat Sarawak? Kita cari satu cara di mana pengiraan undi dapat dilakukan secara telus, bersih, adil tetapi jangan kita abaikan rakyat Sarawak yang tidak dapat balik untuk mengundi sama ada di Kuala Lumpur, di Johor, Penang, mahupun di Sabah. Jangan disebabkan halangan ekonomi, halangan harga tiket, halangan jauh kita hendak terbang ataupun mungkin mereka sekarang untuk mendapatkan pekerjaan susah. Kalau bos tidak bagi mereka balik, mereka takut hilang kerja kerana sekarang kita tahu susah hendak cari kerja.

Jangan disebabkan faktor-faktor ini, mereka tidak menunaikan tanggungjawab yang termaktub dalam Perlembagaan Malaysia. Jangan kita biar undi sebagai satu hak bagi orang kaya sahaja. Ini adalah kebimbangan saya, ini adalah kerisauan saya. Jadi saya berharap, mungkin saya ingin mendapatkan penjelasan daripada pihak kerajaan, kenapa? Mungkin kita tidak faham apakah implikasi ataupun kesusahan untuk melakukan reformasi seperti saya katakan tadi sama ada *absentee voting* ataupun undi pos.

#### ■1450

Saya tahu teknikal dia memang ada. Akan tetapi, mungkin saya ingin dapat penjelasan kenapa ia tidak dilakukan dalam dua tahun ini. Adakah ia akan

dilakukan untuk masa hadapan terutamanya kita ada Pilihan Raya Umum yang mungkin akan datang dan apakah perancangan kerajaan untuk mereformasikan – *We have to adapt to the new plan*, dengan izin serta apakah perancangan kerajaan. Dengan itu, terima kasih Tuan Yang di-Pertua. Terima kasih Yang Berhormat Timbalan Menteri.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Bandar Kuching. Kalau ikut peraturan, kita boleh memanggil satu atau dua pembahas-pembahas yang lain. Akan tetapi, oleh sebab hanya ada satu sahaja, maka dengan ini saya menjemput Yang Berhormat Menteri di Jabatan Perdana Menteri atau Timbalannya untuk menjawab perbincangan ini. Silakan.

**Timbalan Menteri di Jabatan Perdana Menteri (Parlimen dan Undang-undang) [Datuk Wira Hajah Mas Ermieyati binti Samsudin]:** *Bismillahi Rahmani Rahim. Assalamualaikum warahmatullahi wabarakatuh* dan salam sejahtera. Terima kasih saya ucapkan kepada Tuan Yang di-Pertua dan juga Yang Berhormat Kuching yang telah pun bertanyakan soalan di bawah Peraturan Mesyuarat 18(1).

Tuan Yang di-Pertua, untuk makluman Ahli Yang Berhormat, Perkara 119 sub 1 Perlembagaan Persekutuan menetapkan kelayakan pemilih adalah seperti berikut:

- (i) telah mencapai usia 21 tahun;
- (ii) bermastautin dalam satu bahagian pilihan raya pada tarikh kelayakan sedemikian atau jika tidak bermastautin sedemikian, ialah seorang pengundi yang tidak hadir; dan
- (iii) didaftarkan di bawah peruntukkan mana-mana undang-undang yang berhubung dengan pilihan raya dan juga daftar pemilih sebagai pemilih dalam bahagian pilihan raya tempat dia bermastautin pada tarikh kelayakan.

Jadi, bagi maksud tersebut, SPR menentukan bahagian pilihan raya seorang pemilih berdasarkan kepada alamat bermastautin pemilih seperti di dalam kad pengenalan dan juga pengkalan data Jabatan Pendaftaran Negara. Jadi, bagi maksud pelaksanaan Pilihan Raya Umum Dewan Undangan Negeri Sarawak ke-12, kemudahan pengundi secara pos hanya diberikan kepada pengundi-pengundi dalam kategori seperti berikut:

- (i) ahli SPR dan juga kakitangan SPR;
- (ii) petugas pilihan raya;
- (iii) tentera, polis termasuklah anggota Pasukan Gerakan Am (PGA) yang bertugas pada hari mengundi;
- (iv) pengamal media yang bertugas membuat liputan pilihan raya di luar kawasan pada hari mengundi;
- (v) kakitangan bagi sembilan agensi iaitu Jabatan Bomba dan Penyelamat Malaysia, Jabatan Penjara Malaysia, Agensi Penguatkuasaan Maritim Malaysia, sukarelawan simpanan polis, Jabatan Imigresen Malaysia, Jabatan Kesihatan Malaysia, Jabatan Pendaftaran Negara, UTC, Angkatan Pertahanan Awam Malaysia dan Agensi Pengurusan Bencana Negara yang bertugas pada hari mengundi;



- (vi) pengundi Malaysia yang berada di luar negara; dan
- (vii) pengundi tidak hadir iaitu pengundi tidak hadir luar negara iaitu penjawat awam yang berkhidmat di luar negara dan juga pasangan serta pelajar universiti ataupun institusi tinggi sepenuh masa di luar negara dan juga pasangan.

Jadi, Tuan Yang di-Pertua, pengundi-pengundi di negeri Sarawak sudah sedia maklum tentang tarikh mengundi yang telah pun ditetapkan pada 18 Disember iaitu hari Sabtu dan juga bermula dari hari ini 1 Disember. Lokasi pusat mengundi boleh disemak melalui portal rasmi SPR ataupun melalui aplikasi MySPR Semak. Sehubungan dengan itu, perancangan untuk keluar mengundi bolehlah dilakukan sewajarnya. Saya faham tentang apa yang telah pun dibangkitkan oleh Yang Berhormat sebentar tadi sebab saya baru sahaja melabuhkan tirai untuk PRN negeri Melaka. Jadi, kekangan, kerisauan dan juga perhatian untuk pihak SPR melihat perkara ini saya tahu menjadi keresahan pihak Yang Berhormat.

Untuk itu Tuan Yang di-Pertua, SPR bertanggungjawab untuk melaksanakan PRU DUN Sarawak ke-12 dalam tempoh COVID-19 ini berikutan pembatalan Proklamasi Darurat Sarawak yang telah pun mendapat perkenan Seri Paduka Baginda Yang di-Pertuan Agong dan juga pengisytiharan pembubaran DUN Sarawak ke-18 pada 3 November 2021.

Jadi, SPR dengan kerjasama pihak Kementerian Kesihatan Malaysia, Majlis Keselamatan Negara dan juga Jawatankuasa Pengurusan Bencana Negeri Sarawak sedang meneliti dan juga merangka satu prosedur SOP pencegahan COVID-19 bagi pelaksanaan PRU DUN Sarawak ke-12. Penyediaan SOP ini akan ditambah baik dengan mengambil kira situasi semasa COVID-19 pada ketika ini terutamanya pengalaman di PRN Sabah dan juga di PRU DUN negeri Melaka yang lalu. Ia juga selaras dengan fasa Pelan Pemulihan Negara dan juga arahan semasa Perintah Kawalan PKP di bawah Akta 342 yang dikuatkuasakan oleh pihak kerajaan.

Jadi, SOP ini merangkumi semua perkara termasuklah daripada segi taklimat petugas pilihan raya, hari penamaan calon, proses cetakan, semakan kertas undi, proses pengeluaran, penerimaan dan juga pengiraan undi pos, hari semakan peti undi, tempoh berkempen, hari undi awal dan juga undi biasa serta penjumlahan rasmi undi. Jadi, antara pencegahan COVID-19 untuk pelaksanaan pilihan raya adalah seperti berikut – Memang susah Yang Berhormat. Saya hari itu tidak boleh hendak berkempen, Tuan Yang di-Pertua. Jadi, Tuan Yang di-Pertua pun ada datang makan-makan dekat Melakakan. Kita terserempak. Jadi, betapa susahnyanya kita untuk berkempen pada waktu dan ketika itu.

Jadi, antara perkara-perkara SOP yang telah pun dilakukan oleh pihak SPR ialah yang pertamanya adalah pembersihan dan sanitasi di semua premis yang dikenal pasti yang juta akan diguna pakai bagi tujuan pilihan raya yang mana ia perlu dilakukan disinfeksi sebelum, semasa dan juga selepas selesai digunakan berdasarkan garis panduan yang ditetapkan oleh KKM.

Kedua, kawalan kehadiran di setiap premis yang digunakan bagi tujuan pilihan raya pada jumlah yang sangat minimum yang tidak menjejaskan proses pilihan raya dan juga mematuhi penjarakan fizikal sekurang-kurangnya satu meter. Selain daripada itu juga, maklumat kehadiran setiap individu seperti nama,

nombor telefon perlu direkodkan sama ada menggunakan MySejahtera QR kod di aplikasi MySejahtera ataupun catatan buku secara manual.

Seterusnya, terdapat juga penjarakan fizikal di premis perlu dilaksanakan di mana susun atur meja di setiap premis yang digunakan disusun dengan jarak dua meter. Manakala, jarak antara individu adalah sebanyak satu meter. Penggunaan *hand sanitizer* sebelum dan semasa berada dalam saluran dan selepas selesai urusan bagi tujuan pilihan raya serta penggunaan tangan sarung getah adalah diwajibkan bagi semua petugas pilihan raya termasuk juga SPR yang bertugas bagi setiap proses pilihan raya. Begitu juga dengan penggunaan *facemask* yang wajib bagi semua individu yang hadir di premis bagi bertujuan untuk pilihan raya.

Pengundi yang bergejala di mana ada suhu melebihi daripada 37.5 darjah *celsius*, batuk, sakit tekak ataupun susah bernafas hendaklah diasingkan serta merta pada pengundi yang lain dan mengundi di tempat khas iaitu ada satu khemah khas yang diberikan untuk mereka memangkah. Akhir sekali calon ataupun parti digalakkan untuk menggunakan media masa, media sosial dan juga media cetak untuk tujuan kita berkempen.

Jadi, tadi Yang Berhormat juga ada menyentuh tentang beberapa perkara berkenaan dengan cadangan Pejabat Pilihan Raya Negeri sebagai Pusat Pengiraan Undi. Jadi, di sini kita menyatakan bahawa untuk memberikan ruang undi pos kepada mereka yang tidak dapat pulang ke kampung, ia ada melibatkan isu teknikal untuk mengumpul semua kertas undi kerana sistem pengundian adalah berdasarkan Dewan Undangan Negeri. Kita memerlukan lebih kurang – sebab dia ada melibatkan 82 Dewan Undangan Negeri. Jadi, kita memerlukan lebih kurang 82 peti undi bagi setiap lokasi undi. Jadi, ia akan melibatkan masalah daripada segi pengurusan logistik dan juga petugas yang amat tinggi nanti.

Dalam SOP pencegahan COVID-19 juga kalau kita tengok dalam pelaksanaan PRU DUN Sarawak, SPR juga ada mencadangkan untuk kita menetapkan sama macam Melaka hari itu. Okey, pukul 8 ke pukul 9 untuk umur berapa. Jam 9 ke 10 untuk umur berapa. Ini dicadangkan akan tetapi tidak tertakluk kepada mereka untuk patuhi tetapi kita cadangkan supaya mereka ini patuhi.

Saya hendak berkongsi pengalaman dengan Tuan Yang di-Pertua dan juga Yang Berhormat. Sebenarnya dalam tempoh dua tahun – bukanlah saya hendak ini tetapi saya melihat bagaimana kesungguhan dan juga komitmen pihak SPR menguruskan terutama sekali dalam tempoh setahun lebih ini tentang bagaimana mereka memberikan perhatian khusus untuk melaksanakan Undi 18 dan juga undi automatik ini. Jadi, kalau Yang Berhormat kata maksudnya kegagalan pihak SPR itu, saya kurang bersetuju. Oleh sebab, mereka pada kali ini mereka amat kekangan daripada soal *manpower* dan sebagainya terutama sekali dalam hendak menjadikan urusan Undi 18 dan juga automatik *by the end of this year* dengan izin menjelang hujung tahun ini. Jadi itu pun *alhamdulillah* hampir akan dilaksanakan *by 1 Januari 2021*. Itu pun perkara – ini akan dapat kita lakukan.

Jadi saya lihat bahawa kalau sebagaimana Yang Berhormat sentuh tadi iaitu sejauh mana untuk kita penggunaan elektronik untuk *devices* dan sebagainya dan cadangan untuk *absentee voting* juga, kita masih dalam kajian untuk melaksanakan penggunaan pilihan raya elektronik ini supaya memudahkan.

Saya setuju maksudnya sebagai mana cadangan Yang Berhormat, sekarang ini guna teknologi, apa juga pun, kita *meeting* hari ini pun sudah tidak perlu bersemuka, tetapi kita pakai Google Meet dan juga sebagainya. Apa salahnya, cadangan – ramai ya, dia kata, kalau dapat digunakan sebagai *e-voting* dan *i-voting* yang ada dia punya inikan – untuk memudahkan. Akan tetapi, untuk makluman Yang Berhormat, SPR sedang menjalankan kajian mengenai penggunaan *e-voting* dan juga dijangka selesai pada tahun hadapan.

Selain daripada aspek kebaikan dan juga keburukan pelaksanaan *e-voting*, SPR juga perlu menilai isu-isu kerahsiaan, keselamatan, kos dan juga pendidikan pengundi. SPR akan mengadakan libat urus dengan pihak yang berkaitan sebelum sebarang keputusan dapat kita kemukakan kepada pihak kerajaan. Itu sahaja, terima kasih.

**Dr. Kelvin Yii Lee Wuen [Bandar Kuching]:** *[Bangun]* Boleh?

**Timbalan Yang di-Pertua [Dato' Mohd Rashid Hasnon]:** Boleh. Ini perbahasan. Peraturan Mesyuarat 18(1) boleh.

**Dr. Kelvin Yii Lee Wuen [Bandar Kuching]:** Okey, terima kasih, Tuan Yang di-Pertua. Terima kasih Yang Berhormat Timbalan Menteri atas jawapan tersebut. Sekali lagi saya ingin menyentuh bahawa saya tidak hendak – apabila saya kata SPR 'gagal', saya tidak kata SPR 'gagal' sepenuhnya. Akan tetapi, bagi saya SPR – mereka memang melakukan atau menjalankan pilihan raya konvensional secara besar-besaran. Di Melaka, saya melihat bagaimana mereka menguruskan proses pilihan raya memang sangat licin dan teratur. Akan tetapi, isu saya adalah gagal mencari inovasi yang penting kerana semasa pandemik – Saya tahu, SOP yang dikatakan tadi saya tidak pertikaikan.

Saya sebagai seorang doktor, saya tahu itu sangat penting. Akan tetapi, kalau kita hendak hadapi – bukan sahaja pandemik ini, tetapi pandemik pada masa hadapan, kita kena lebih *innovative*. Jadi, bagi saya ada beberapa negara, negara lain, mereka memperkenalkan *absentee voting*. Bagi saya, alasan yang digunakan antaranya kerana logistik, kerana kena sediakan 82 buah peti undi. Ini bagi saya ini alasan yang agak lemah. Kalau kita hendak *invest, why not invest in the democracy?* dengan izin. Kalau kita hendak sediakan 82 buah peti, kenapa kita tidak boleh sediakan? Terutamanya ini melibatkan hampir 250,000 orang rakyat Sarawak di Semenanjung Malaysia. Ini adalah anggaran yang diberikan oleh beberapa pihak.

Jadi, kenapa tidak lakukan ini? Sudah hampir – saya tahu, SPR sangat rajin untuk membuat Undi 18 dan AVI ini. Saya tahu ini satu proses yang sulit. Akan tetapi, kenapa tidak *prepare* untuk satu pilihan raya dalam masa pandemik? Bagi saya, inovasi ini sangat penting. Jadi, saya berharap – mungkin saya hendak letak dalam *record*, saya berharap Timbalan Menteri sendiri akan – *will push this matter*. Saya harap SPR akan lebih inovatif, berani mengambil langkah yang lebih di luar kebiasaan, *out of the normal*.

Ini terutamanya kerana – *I can tell you, this would not be the last pandemic that we will face. So, again* kalau kita hendak lihat satu pilihan raya tahun depan dengan *variant* Omicron ini, ia satu isu yang sangat merisaukan. *So, I hope*-lah Timbalan Menteri akan secara persendirian dalam jawatan yang ada, *push for this matter in that reformasi*. Sekian, terima kasih.

**Timbalan Yang di-Pertua [Dato' Mohd Rashid Hasnon]:** Terima kasih, Yang Berhormat Bandar Kuching. Sila, Timbalan Menteri.

**Datuk Wira Hajah Mas Ermieyati binti Samsudin:** Terima kasih, Yang Berhormat. Saya setuju dengan cadangan. Malah, kita juga akan memberikan perhatian tentang cadangan Yang Berhormat untuk melihat tentang inovasi yang perlu ditekankan dan juga diserapkan dalam aplikasi dan juga kerja-kerja SPR selepas ini.

Itu pun sudah dalam pelaksanaan yang telah pun kita lakukan. Cuma, apa yang menjadi kebimbangan kita adalah tentang soal kerahsiaan (*security*) dan sebagainya yang itu yang harus kita berikan penekanan selain daripada masa akan datang yang melibatkan tentang soal kesihatan dan keselamatan terutama sekali untuk pengundi. Pastinya...

**Dr. Kelvin Yii Lee Wuen [Bandar Kuching]:** [*Bangun*] Boleh saya tanya?

**Datuk Wira Hajah Mas Ermieyati binti Samsudin:** Ya.

**Dr. Kelvin Yii Lee Wuen [Bandar Kuching]:** Mungkin boleh huraikan secara lebih, apa masalah kerahsiaan yang dihadapi tersebut dan mungkin jika saya boleh lebih faham, kita boleh bincang sama bagaimana untuk selesaikan.

**Datuk Wira Hajah Mas Ermieyati binti Samsudin:** Okey, apabila melibatkan data, Tuan Yang di-Pertua, tentang data pengundi dan sebagainya ia melibatkan tentang kerahsiaan maklumat pengundi dan sebagainya. Jadi, apabila kita melibatkan sistem, kita harus melihat sistem yang terbaik, yang mempunyai keselamatan yang boleh menjamin keselamatan data, terutama sekali melibatkan data pengundi seluruh negara. Sekiranya, Yang Berhormat mencadangkan untuk dilaksanakan hanya di Sarawak, ini tidak adil juga untuk negeri-negeri lain.

Maka, kita harus laksanakan di semua negeri. Jadi, apabila hendak laksanakan di semua, takkan dalam tempoh tiga minggu, tiba-tiba hendak laksanakan untuk di Sarawak. Kalau macam itu saya tahu hari itu, saya pun mahu buat dekat Melaka. Oleh sebab, apabila ramai pengundi luar tidak dapat balik, jadi mungkin – Kalau hari itu kita sudah *implement* maksudnya, dengan izin, kita boleh laksanakan, pastinya keadaan berbeza apabila lebih ramai dapat pulang untuk mengundi atau dapat keluar mengundi pada PRN yang lepas.

Akan tetapi, apabila kita mengatakan soal keselamatan – soal untuk boleh kita melaksanakan, kita tidak mahu apabila kita laksanakan nanti tiba-tiba kita akan patah balik kepada undi sebagai mana tradisional, sebagai mana yang berlaku di Belgium. Sebelum ini, dia sudah buat tradisional, selepas itu dia laksanakan sistem yang melibatkan *voting* secara teknikal dan sebagainya. Akan tetapi, hari ini Belgium kembali semula kepada tradisional.

Begitu juga negara Estonia yang maksudnya tidak semua kerana ia hanya melibatkan beberapa daerah sahaja. Jadi, kalau kita hendak buat, kita harus laksanakan semua tempat. Bukannya hanya – okey, kalau Sarawak minta, kita bagi Sarawak. Jadi, tidak adil bagi negeri-negeri. Kalau boleh kita hendak jika dapat buat secara daripada segi menyeluruh dan secara lebih baik dan juga tidak perlu melibatkan – maksudnya, dua, tiga kali kos yang berbangkit. Terima kasih.

**Dr. Kelvin Yii Lee Wuen [Bandar Kuching]:** [*Bangun*] Terima kasih, Tuan Yang di-Pertua. Saya bukan kata Sarawak ini istimewa sangat. Akan tetapi, kita haruslah memahami konteks yang mungkin berbeza. Kalau saya cakap tentang Sarawak dan Sabah kita dipisahkan oleh Laut China Selatan. Kalau, contohnya Melaka, saya boleh memandu dari Penang untuk pergi mengundi. Saya cuma perlu bayar tol dan duit minyak.

Akan tetapi, kalau hendak terbang balik ke Sarawak atau ke Sabah, terutamanya sekarang kita lihat RM1,000 *one-way*. Ini memang – bagi saya, *we cannot let voting be for the rich*, dengan izin. So, mungkin satu pertimbangan khas dibuat. Saya tahu memang susah kita mahu buat dalam tiga minggu ini, tetapi jika boleh, mungkin satu *pilot project*.

Saya sebenarnya tidak lihat *anything wrong* jika kita cuba satu perkara selepas itu kalau tidak berjaya, kita boleh beralih ke satu perkara yang lama. *I feel it's part of the learning curve*. Kalau kita lihat, contoh di Australia, mereka juga menggunakan *absentee voting* ini iaitu saya boleh mengundi di mana-mana sahaja, mereka letakkan peti undi. Australia besar, banyak juga kawasan dan ia dapat dilakukan. Mungkin, saya tahu SPR mereka lebih berpengalaman daripada saya, tetapi mungkin mereka dapat melihat model tersebut diadaptasikan kepada *local context* yang kita ada dan *how can we be innovative*-lah, itu saranan saya. Terima kasih.

**Datuk Wira Hajah Mas Ermieyati binti Samsudin:** Okey, terima kasih Yang Berhormat. Saya memahami dan kita pun pernah berada dalam diskusi secara atas talian, saya menghargai segala pandangan Yang Berhormat dan juga Yang Berhormat begitu prihatin untuk melihat kebolehlaksanaan daripada pihak SPR, penambahbaikan yang dilakukan oleh pihak SPR.

Saya sebagai Timbalan Menteri, memberikan jaminan bahawa kita akan memberikan perhatian tentang perkara ini. Ini kerana, kita tidak mahu Malaysia juga ketinggalan di belakang. Kita juga mahu terus maju bersama dengan apa juga teknologi dan IR4.0. Untuk itu, apa jua saranan Yang Berhormat, akan kami berikan perhatian dan untuk tindakan kami selanjutnya. Terima kasih, Tuan Yang di-Pertua.

**Timbalan Yang di-Pertua [Dato' Mohd Rashid Hasnon]:** Baik, terima kasih. Terima kasih Ahli-ahli Yang Berhormat. Masa sudah mencukupi bagi usul di bawah Peraturan Mesyuarat 18 ini dibahaskan. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 2 Disember 2021. Terima kasih, Ahli-ahli Yang Berhormat.

**[Kamar Khas ditangguhkan pada pukul 3.08 petang]**